


## Ибратнома



14:00 / 25.03.2022 3319

Мисрнинг «Ал-Аҳром» газетасининг 1961 йил 29 май ойидаги сонида «Профессор аёл талаба қизларга турмушга чиқишни тавсия қилди» номли мақола эълон қилинди.

Бу мақолада Англиядаги бир университетнинг аёл профессорларидан бири нафақага чиқаётib ўзининг юзлаб талаба қизларига турмушга чиқишиларини тавсия қилгани ҳақида гапирилади. Мақолада профессор аёл шундай дейди:

«Мана бугун мен олтмиш ёшга кирдим. Бу ёшгача жуда юқори мансабларга, илмий даражаларга эришдим. Жамиятда жуда катта обрў-эътиборга эга бўлдим. Деярли ҳар куним фойда билан ўтар эди. Катта шуҳрат ва мавқега эга бўлдим. Кўп мол-давлатга эга бўлдим. Пулим кўплиги сабабли бутун дунёни айландим. Аммо шунча ютуқларга эришган бўлсамда, ўзимдан сўрайман: «Мен бахтлимани?».

Мен ўқиши, дарс бериш, сафар қилиш ва шуҳратга берилиш соясида аёл киши учун муҳим бўлган энг зарур нарсани унутибман.

Мен турмушга чиқишни унутибман. Фарзанд кўришни ёдимдан чиқарибман. Уйда ўтиришни тарк қилиб қўйибман!

Буни фақатгина олтмиш ёшга кириб нафақага чиқаётганимдагина англадим. Мана шу лаҳзаларда ҳаётимда ҳеч бир иш қилмаганимни тушуниб етдим. Шунча йил мобайнида қилган ишларим шамолдаги түзон сингари сочилиб кетганини ҳис қилдим. Нафақага чиққанимдан сүнг бир-икки йил үтар, ана шунда инсонлар ҳаёт ташвишлари ичра мени унутиб юборишади. Агар турмушга чиқиб катта бир оилани шакллантирганимда, ҳаётда жуда катта из қолдирған бўлар эканман!

Аёлнинг вазифаси турмушга чиқиши, оилани шакллантириш экан. Аёл кишининг бундан бошқа майдонда сарфлайдиган қувватида ҳеч қандай фойда йўқ экан. Мен барча талаба қизларимизга энг аввало мана шу фикрни олдинга қўйишишларини, сўнгра илмий ишлар ва шухрат ҳақида ўйлашларини тавсия қилган бўлар эдим!».

Азизлар, юқоридаги аёл каби бечоралар умрларини зое қилиб, қариган чоғларидагина, умр қуёши ботаётганида турмуш ҳақида ўйлаб қолишади. Мана шундай аёлларга эргашиб бораётган муслима қизлардан таажжубдаман. Ваҳоланки, Аллоҳ бизга тўғри йўлни кўрсатди, уни баён қилиб берди. Аллоҳнинг йўлидан чалғиманг!

**Абдулқодир Полвонов**